

*Cor neq̃ venarum, neque ner-  
vorum, principium.*

**C**Aerea nervorum non debent vinetula cordi  
Principium: fas sit mihi dicere pace Lycæi.  
Namq̃ sub amplexu noctis, cum tempora somnus  
Præcipitat, torpent nervorum flaccida lora;  
Et sensus premit alta quies: sed perpetue pulsus  
Cor salit, irrequies defessaq̃ pectora calcat.  
Quinetiam duro cerebrum si vulnere mæret:  
Genua labant, oculiq̃ natant, sensusq̃ rigescunt:  
At si fulmineus trepidum cor hauriat ensis,  
Protinus, haud sensus, & motum, ferreus urget  
Somnus: sed modico serpit mors invida gressu.  
Sic & venarum salientes sanguine rivos,  
Ascribit cordi Stagyrae sententia fallax:  
Nam velut in quereu, (multa quæ nobilis umbræ  
Fronduferum caput educit,) sub vertice & oris  
Ramorum minor est soboles, sed maxima trunco  
Crassities proprior: sic & cava vena meatu  
Amplior est, quæ se jecori committit: at arte  
Colligit ad cordis thalamos sinuantia terga.  
Adde quod à dextro cordis Stagyrita putavit  
Emanare sinu Magnam cognomine venam,  
Cum tamē hoc thalamo videntur plurima môstra  
Squâmigeri pecoris, quæ vena hæc magna recurvat.

*Ergo principium nusquam de corde rubentes  
Vena & nervorum viscida lora trahunt.*

*Iniquum est, matres non  
lactare infantes suos.*

**N**Empe puerperij violentos passa dolores  
Detrahas natum lacte fovere tuum?  
Abjicis à partu puerum, & vis mater haberi?  
Erras: dimidium est hoc genetricis opus.  
Sis mater pueri totius, totaq̃ mater:  
In nutrice amor est, in pariente labor.  
Ignotum, quæ visceribus, quæ sanguine pavit;  
Quis pudor est notum, non alere uberibus?  
Nunc hominem, nunc spirantem vitalibus auris,  
Nunc qui te mammam postulet, atque vocet?  
Anne papillarum matri data tubera credis,  
Pectora ut exornent, pignora non ut alant?  
An nihil intererit, cuius de lacte fovetur?  
Intererit cuius sanguine natus erit?  
Vel quoniam niveo mutata est purpura succo,  
Non est lac sanguis, qui modo sanguis erat?  
Ergo hinc nobilitas animorum ab utroq̃ parentum,  
Degenerat succo devitiata novo.  
Si hæc ovis fugat ovem, capræ enutriverit agnum,  
Durius huic: illi, mollior inde pilus.  
Sic etiam laurus quæ frondis honore superbit  
Translata ex alio, languida crescit agro.

**ERGO**

*Vilitas, ratio, pudor & natura requirunt  
Vt mater natos nutriat ipsa suos.*